



23. juli 2013

UKA 2013/87

Inatsisartut suleriaasianni § 33 naapertorlugu aalajangiussassatut siunnersuut una saqqummiuppara:

Naalakkersuisut telemik niuernerup piviusumik unammilleqatigiiffiunissaanik ammaassillutik kingusinnerpaamik UPA 2014-imi inatsisitigut aaqqiissuteqarnissaq pillugu saqqummiussinissamut pisussaaffilerneqarnissaannik Inatsisartut aalajangiussassaattut siunnersuut, taamaalillutik internetimik neqeroorutillit nutaat niuerfimmut isersinnaalerniassammata. Tamatumunnga ilanngullugu qulakkeerneqartariaqarpoq telemik niuernermi pilersuisussaataaneq attatiinnarneqassasoq pilersuisussaataaneramilu amigartooruteqarneq telemik ingerlatallit ersoqatigiillutik matussusertassagaat.

(Inatsisartuni ilaasortaq, Naaja Nathanielsen, Inuit Ataqatigiit)

Tungavilersuut

Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut peqqussutaat nr. 17, 20. november 2006-imeersumik akuersissuteqarnikkut, attaveqaatitigut niuernerup ammanerusumik ingerlanneqalernissaa periarfissiuunneqarpoq. Inatsisartut peqqussutaat 1. januar 2007-mi atuutilerpoq. Atuutilerneraniit ukiut arfineq-marluk ingerlareeraluartut peqqussut aallaavigalugu nalunaarummik maannamut sulii atuutilersitsisoqarnikuunngilaq.

”Attavigissaarneq – Grønlands IKT-strategi 2011-2015”-mi allassimavoq inatsisit maannamut atuuttut pineqartumi matumani pisariaqartumik unammilleqatigiittoqarnissaanut periarfissaqartitsinngitsut internetimillu neqerooruteqarsinnaasut nutaat niuernermi ilaalernissaannut naammannatik. Periusissiap ukialuit qaangiuppata atorunnaarnissaa eqqarsaatigalugu naligiinngitsumillu unammiffiuneranik suliat siulliit maanna ingerlanneqareernerat eqqarsaatigalugu inatsisit atuuttut erseqqissaaviginissaat pisariaqarsorinarpoq.

Soorunami nuna tamakkerlugu tamakkiisumik unammilleqatigiinnissamut assigiimmik atu-gassaqartitsisoqanngilaq. Nunap ilarujussuani immap naqqatigut kabeli atorlugu attaveqartoqanngilaq, satellitikkoortumilli imaluunniit radiokæde aqutugalugu attaveqarluni. Innuttaasullu amerlassusaat kisiat eqqarsaatigigaanni nunap immikkoortui taakku assigiimmik unammilleqatigiiffiusinnaanissaat ajornakusoorpoq. Tamannami imminut akilersinnaanngilaq.

Piffissamili kalaallit inuiaqatigiit aammalu nunarsuarmioqatitta akornanni peqataanissat-sinnut internettikkut attaveqarneq annertuumik pingaaruteqartillugu pinngitsoorneqar-sinnaanngilaq innuttaaqatitta immap naqqatigut kabelimik periarfissaqanngitsut ineriartornermi ilaatinneqalernissaat. Taamaattumik pingaaruteqarpoq sumiiffinni allatigut akilersinnaanngitsuni pilersuisussaataanerup qulakkeerneqarnissaa. Tamatumani pingaarpoq pissutsit atuuttut illoqarfanni immap naqqatigut kabeli atorlugu attaveqarfiusunit ajorneruallaannginnissaat qulakkiissallugu. Aaqqiissuteqartoqanngippammi ungasinnerusoq isi-

galugu nunap ilaani innuttaasullu akornanni periarfissat naapertuutinningsumik equngasorujussuannngussapput.

Pisortani aningaasaqarnikkut allaffissornikkullu kingunerisassa.

Inatsisitigut allannguutissat suliarineqarnerinut aningaasartuutissat killeqassasut naatsorsuutigineqarpoq, ilimagineqarmat ”Attavigissaarneq – Grønlands IKT-strategi 2011-2015”-mi takorluukkat atuutillersinnissaannut suliaq Naalakkersuisut ingerlatilereersimassagaat.

Namminersorlutik inuussutissarsiortunut aningaasaqarnikkut allaffissornikkullu kingunerisassa.

Siunnersuut inatsisit allanngortinneqarnerannik kinguneqassappat namminersorlutik inuussutissarsiortut pitsaanerusunik atugaqalernissaannik kinguneqarsinnaavoq, tassami unammilleqatigiittoqalernerup nassatarisinnaassammagu TELE A/S-ip kiffartuussiniarnera atorunillu tuniniaanera akitigut unammillerneqassasoq. Internetimik attaveqaasersuinikkullu neqerooruteqartartut amerlanerulernerisigut periarfissat assigiinngitsut akitigullu neqeroorutigineqarsinnaasut assigiinngisitaartut piffissaq ungasinnerusoq isigalugu aamma ammaaneqarsinnaassapput.

Innuttaasunut aningaasaqarnikkut allaffissornikkullu kingunerisassa.

Siunnersuut inatsisit allanngortinneqarnerannik kinguneqassappat innuttaasut pitsaanerusunik atugaqalernissaannik kinguneqarsinnaavoq, innuttaasut namminersorlutik inuussutissarsiortut assigalugit aamma attaveqaasersuinikkut neqerooruteqartartunik arlariianik toqqagassaqalersinneqassammata. Attaveqaasersuinikkut neqerooruteqartartut assigiinngitsut unammilleqatigiilernerisa kingunerisaanik piffissap ingerlanerani aamma suliffeqarfiit akunnerminni kiffartuussinikkut akitigullu pitsanngorsaasariaqalernerannik nassataqassaaq.